

Mugit hæc inter bos lene: audire putares,
Mygdonia argutam fundit quam tibia, vocem;
Molliæque inflexit crurum curvamina, & herba
Procidit in viridi, nympham cervice reflexa
Aspiciens præbensque adstanti grandia terga.
Tum virgo tali voce est affata sodales:

Dilectæ o sociæ properate: insidere tauro
Jam placet. ille quidem dorsum substravit, & omnes
Ceu ratis excipiet. quam visu est lenis, & ore
Quam blando! haud aliis similis. mens insidet illi,
Mens hominum facilis, solius & indiga vocis.

Dixerat; ac ridens tergo consedit in alto;
Dumque aliæ attingunt sese, jam virgine amata
Exsiluit rapta taurus, gressuque volucris
Se freta proripuit citus ad Neptunia. at illa
Deserta mœsta conclamat voce sodales,
Brachiaque incassum tendit: non ulla sequendo
Cursum æquare valet. namque ocyor ille relinquens
Litora, ceu rapidus delphin, maria alta secabat.

Grandibus at phocis investæ gurgite ab imo
Nereïdes venere omnes, atque agmine pulcro
Implicuere choros. summas perlabitur undas
Neptunus pater ipse rotis, magnoque tridente
Sternit iter fratri. circum glomeratur in orbem
Humida gens ponti, Tritones; lætaque conchis
Carmina raucisonis, lætosque canunt hymenæos.

Nympha Jovis magni taurino in corpore sidens
Hæc tenet incurvum cornu bovis, aurea at illa
Dædaleæ collecta manu velamina vestis:
Ima tamen spumat canenti fimbria fluctu.
Ast humeros circum fluitantia lina tuebant,
Ceu navis quum vela tument, nymphamque levabant,